



PROCESVERBAL

Nga mbledhja e rregullt e Kuvendit Komunal të Rahovecit, e mbajtur më **28.2.2023 (e martë)**, me fillim në orën **10:00**. Mbledhjen e kryesoi Kryesuesi i Kuvendit, **z. Defrim Kafexhiu**. Në fillim konstatoi se ka kuorum për mbajtjen e mbledhjes.

Kryesuesi: Fillimisht, përshëndetje për të gjithë! I nderuar Kryetar i Komunës, **z. Smajl Latifi**, Nënkyetar i Komunës, **z. Fatmir Iska**, të nderuar anëtarë të Kuvendit komunal, drejtorë të Drejtorive komunale, zyrtarë komunalë, përfaqësues të KFOR-it, media, përshëndetje për nxënësit të cilët kanë ardhur ta përcjellin mbledhjen nga afër. Të nderuar qytetarë të Komunës së Rahovecit, kjo është seanca e dytë (2) për këtë vit kalendarik Komitoh për Politikë dhe Financa, në mbledhjen e mbajtur më 16 shkurt, për këtë seancë ka përgatitur këtë

REND DITE

1. Shqyrtimi dhe miratimi i procesverbalit nga mbledhja e kaluar;
2. Pyetjet dhe përgjigjet në pyetjet e kuvendarëve;
3. Shqyrtimi dhe miratimi i propozim-vendimit për ndryshimin dhe plotësimin e vendimit 01 Nr.406/22, i datës 28.12.2022, për miratimin e Planit të Mobilitetit Urban 2022- 2027;
4. Shqyrtimi dhe miratimi i propozim-vendimit për ndryshimin dhe plotësimin e vendimit 01 Nr.404/22, i datës 28.12.2022, për miratimin e Planit të Vlerësimit të Rreziqeve nga Fatkeqësitë Natyrore dhe Fatkeqësitë e Tjera për Komunën e Rahovecit;
5. Shqyrtimi dhe miratimi i ndryshim plotësimit të Rregullores 01 Nr.05/23 të datës 30.01.2023 për Ndryshimin dhe Plotësimin e Rregullores për Taksa Komunale 01 Nr. 80/20 e datës 29.06.2020, e ndryshuar dhe plotësuar me Rregulloren 01 Nr. 169/21 të datës 26.02.2021;
6. Shqyrtimi dhe miratimi i propozim-vendimit për faljen e borxheve të papaguara për taksat në aktivitete (afariste), nga data 1.1.2000– 31.1.2017;
7. Shqyrtimi dhe miratimi vendimit për shfuqizimin e vendimit 01 Nr.149/2006 i datës 14.07.2006;
8. Shqyrtimi dhe miratimi i propozimit për caktimin e komisionit për zgjedhjen e drejtorëve dhe të zëvendës drejtorëve në institucionet edukativo- arsimore;
9. Shqyrtimi dhe miratimi i propozim - vendimit për bartjen e mjeteve vetanake nga viti 2022, në vitin 2023;
10. Shqyrtimi dhe miratimi i propozim - vendimit për dhënien e pronës në shfrytëzim afatshkurtër personave fizikë dhe juridikë dhe zhvillimin e procedurave të ankandit publik P-01952-1, zona kadastrale Ratkoc;
11. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme komunale P-01952-1;
12. Shqyrtimi dhe miratimi i propozim - vendimit për dhënien e pronës në shfrytëzim afatshkurtër personave fizikë dhe juridikë P-02240-73, zona kadastrale Rahovec;
13. Shqyrtimi dhe miratimi i propozim - vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme komunale P-02240-73;

Njësia Nr./Br./No 01(Kuvendi i Komunës)

Nr./Br./No 01/23 Nr. i faq/Br.str/No pg 42

Data/Datum/Date 30.02.2023

RAHOVEC/ORAHOVAC

14. Shqyrtimi dhe miratimi i propozim - vendimit për caktimin e lokacionit për ndërtimin e objektit për zhvillimin e aktiviteteve për nevojat e komunitetit, të fshatit Kramovik P-00330-0;
15. Shqyrtimi dhe miratimi i propozim-vendimit për caktimin e lokacionit për ndërtimin e objektit për zhvillimin e aktiviteteve për nevojat e komunitetit të fshatit Polluzhë; - P – 00722-0;
16. Shqyrtimi dhe miratimi i vendimit për këmbimin e pronës komunale me pronë private P- 01041-1, zona kadastrale – Xërxë;
17. Shqyrtimi dhe miratimi i Planit të Punë së Komitetit për Komunitete për vitin 2023;
18. Raporti vjetor për kontratat e nënshkruara publike - 2022 - Kontratat kornizë;
19. Informatë mbi menaxhimin e aseteve për vitin 2022;
20. Informatë nga DKA-ja për përfundimin e gjysmëvjetorit të parë të vitit shkollor 2022/2023;

Kryesuesi: Ky është rendi i ditës për këtë mbledhje. E kemi edhe një propozim për një pikë shtesë.

Afrim Dina: Faleminderit kryesues! I nderuar kryetar, nënkryetar, kolegë, të nderuar anëtarë të kuvendit. E kam një kërkesë për një vendim që ka të bëjë me ndarjen e një parcele për ndërtimin e fushës sintetike për klubet e futbollit në Komunën e Rahovecit. Ky projekt bëhet me bashkëfinancim me federatën e futbollit.

Kryesuesi: Atëherë këtë propozim po e vendosim në votim. Kush është “për”?... Me shumicë unanime, shtohet edhe kjo pikë në rend të ditës. Rendi i ditës i ka 21 pika. Nëse dikush tjetër nuk ka ndonjë koment rreth rendit të ditës, po e vendosim në votim. Kush është “për”?... Me shumicë unanime miratohet rendi i ditës për seancën e sotme.

1. Shqyrtimi dhe miratimi i procesverbalit nga mbledhja e kaluar;

Kryesuesi: A ka dikush prej anëtarëve të kuvendit ndonjë koment rreth procesverbalit nga mbledhja e kaluar?... Nëse jo, atëherë po e vendosim në votim. Kush është “për”?... Me shumicë unanime, miratohet procesverbali i mbledhjes së kaluar.

2. Pyetjet dhe përgjigjet në pyetjet e kuvendarëve;

Bjondina Kleqka: I nderuar kryesues, kryetar, nënkryetar, kolegë këshilltarë. E kam një pyetje për drejtorin e arsimit, Avni Morina. E dimë që në shkollën “Bekim Sylka” janë duke u bërë disa riparime (me efikasitet të energjisë) në hapësirën e brendshme të këtij objekti. Kur nxënësit dhe mësuesit do të kthehen në objektin e tyre?

Bejtullah Deliu: Përshëndetje kryesues, kryetar, zëvendës, drejtorë të drejtorive, kolegë, nxënës të pranishëm. Një pyetje për Drejtorinë e Shëndetësisë dhe atë të Inspektoriatit. Me vendim të komunës, është e rregulluar që një barnatore të jetë kujdestare gjatë natës. Dje, personalisht pata një fatkeqësi, rreth orës 01:25 minuta e mëngjesit më është dashur të blej barna. Fatkeqësisht asnjë barnatore nuk ishte e hapur. A ka përcjellje nga inspektorët?... Faleminderit!

Rasim Fazliu: Përshëndetje për juve, kryetarin e komunës, anëtarët e kuvendit, drejtorët, mediat, përfaqësuesit e OSBE-së dhe nxënësit e pranishëm këtu. E falënderoj drejtorin e bujqësisë që e ka kthyer përgjigjen në një pyetje paraprake timen. Pyetja ka qenë rreth kanalit të kullimit të tokave (Fortesë - Celinë). Në përgjigje shumë gjëra janë thënë dhe kanali do të jetë me gypa, i mbyllur. Uroj që gypat e mbyllur të jenë funksionalë. Meqenëse drejtori nuk qenka këtu, në mbledhjen e radhës duhet të tregojë nëse ka shumë gjatësi të gypave të mbyllur apo vetëm në vendet ku duhet të kalojë rruga. Përndryshe, shumë mirë është që po bëhet kullimi i tokave.

Ilir Pallqa: I nderuar kryesues, kryetar, kolegë asambleistë, drejtorë, të pranishëm në sallë. Po flas pak rreth sheshit në qendër të qytetit. Kur kanë nisur diskutimet për atë minishesh, fillimisht jam gëzuar me shpresën që do të ndërtohet diçka më e mirë, më lehtë e qarkullueshme për automjete, ose më saktësisht të bëhet një zgjidhje e menduar mirë në çdo kënd. Nuk keni ofruar zgjidhje, keni shkaktuar kaos dhe shprehimisht shumë banorë janë të zhgënjyer me atë projekt edhe strukturalisht edhe për pamundësinë e qarkullimit të automjeteve. Ju kuptoj, jeni harxhu, po pritoni. Pritoni ta lodhni kokën që para punimit të ndonjë projekti, të hulumtoni më shumë. Ju kuptoj edhe kur pritoni, duke e harxhuar gjithë atë energji në punësime partiake e familjare, shpërndarjen strategjike të subvencioneve dhe jo vetëm. Pritoni edhe duke i lutur operatorët të presin edhe ndonjë ditë për borxhet që i ka komuna. Këto janë punë të rënda, shkaktojnë lodhje dhe për shkak të këtyre lodhjeve të kota, zhvillimi në komunën tonë është në rënie të lirë tash e disa vite. Zgjidheni gjendjen kaotike në qendër.

Lirigzon Kastrati: Faleminiderit kryesues, kryetar, ekzekutiv, kolegë, media. I kam dy pyetje për ekzekutivin në cilësinë e kuvendarit dhe të anëtarit të Komitetit për Shëndetësi, pyetjet janë kryesisht për Drejtorinë e Shëndetësisë dhe të Shërbimeve Publike. Është një kërkesë e banorëve të fshatrave Hoçë e Vogël – Brestoc, që ka të bëjë me funksionalizimin e AMF-së. A mund t'i ofrojë Drejtoria e Shëndetësisë së paku gjysmë orari?...

Pyetja tjetër ka të bëjë me rregullimin e rrugëve fushore. Jemi në prag të pranverës dhe ato rrugë duhet të jenë të kalueshme që bujqve t'u mundësohet punimi i tokave (Hoçë e Vogël, rruga e ashtuquajtur e "para-katunit").

Kryesuesi: Faleminiderit Lirigzon! Dikush tjetër?... Atëherë nëse e keni përfunduar me pyetje, e ftoj fillimisht drejtorin Avni Morina për përgjigje.

Avni Morina: Përshëndetje kryesues, kryetar, drejtorë të drejtorive, anëtarë të kuvendit, të nderuar nxënës. E nderuar Bjondina Kleqka, pyetja juaj është shqetësim me vend. I kemi dy projekte cilat jemi duke i zbatuar, projekti i eficiencës së energjisë, që ka mbetur vetëm ndriçimi i brendshëm dhe deri me 15 mars do të jetë gati dhe projekti për riparime të brendshme në shkollë, që tashmë ka përfunduar.

Erhan Morina: Faleminiderit kryesues. Të nderuar anëtarë të kuvendit, e kam një sqarim në lidhje me pyetjen e asambleistit Ilir Pallqa. Sa i përket projektit të sheshit në qendër, projekti në fjalë është hartuar nga një kompani projektuese. Duke angazhuar edhe ekspertë nga jashtë. Ka qenë në diskutim publik dy herë radhazi me qytetarë. Ky projekt ende nuk është përfunduar, është në vazhdimësi të punëve dhe me rregullimin e kohës do të përfundojë.

Kryetari: Përshëndetje për kryesuesin, nënkryetarin, anëtarët e kuvendit, drejtorët e drejtorive, OJQ-të, LMT-në, OSBE-në. Rreth shqetësimit të paraqitur të Bejtullah Deliu, është një rregullore e kuvendit të komunës, e cila mendojmë që nuk po zbatohet plotësisht. Është një angazhim i inspektoriatit të komunës, madje me gjoba mandatore (me shumë deri 50 euro, jo më të lartë), por përsëri po vazhdohet. Rreth shqetësimit të Rasim Fazliut, besoj që edhe Berat Duraku do të japë sqarime. Po, ka filluar faza e aplikimit për subvencione dhe i kemi disa punë teknike që shumë shpejt duhet t'i përfundojmë. Lirigzon Kastrati, shpresojmë të kemi mjekë, kemi shpallur një konkurs për 5 mjekë të rinj, do të vazhdojmë me konkurse për personel shëndetësor. Ka filluar aktiviteti për rrugë fushore nga operatori kontraktues, që e ka edhe zonën që lidhet me Hoçën e Vogël, Zoqishtin, Brestocin, Retijën, Optrushën... Ilir, ndoshta neve na ka lodhur aeroplani, kemi qenë jashtë shtetit. Punët e e papërfunduara nuk janë argumente të mjaftueshme për ta nxjerrë një vlerësim objektiv. Punimet në qendër do të vazhdojnë dhe do të merremi me trajtimin e kabllave elektrike që do të futen nën tokë dhe besoj që ky shesh nuk do të bëjë çrregullime. Do ta shohim mundësinë që aty ta bëjmë rrugën një - kahore. Aty të krijohet përshtypja që krijohet tollovi, sepse shumë vetura parkohen pa vend, gjithashtu kemi një mungesë të aktiviteteve policore.

Bejtullah Deliu: Kryetar, faleminiderit për përgjigje dhe angazhimin rreth pyetjes. Gjimat the që janë të vogla, gjithashtu nuk jam i mendimit që gjimat të rriten, por ekziston mundësia edhe një herë për bashkëbisedim me pronarët e barnatoreve.

Kryetari: Po, personalisht i kam takuar pronarët e barnatoreve. Ata zakonisht e bëjnë një plan bashkë, e respektojnë një periudhë, por pastaj fillojnë ta dobësojnë përkushtimin e tyre. Do ta marrim përsipër përsëri këtë shqetësim.

3. Shqyrtimi dhe miratimi i propozim - vendimit për ndryshimin dhe plotësimin e vendimit 01 Nr.406/22, i datës 28.12.2022, për miratimin e Planit të Mobilitetit Urban 2022- 2027;

Përparim Krasniqi: Faleminiderit kryesues! Përshëndetje kryetar, anëtarë të kuvendit. Është bërë një lëshim teknik të cilin do ta marr përsipër. Në tetë ligjet që janë referuar në Plan të Mobilitetit, tre prej tyre kanë pësuar ndryshime. Kanë kërkuar që të rregullohet ligjshmëria në tri ligje. Para jush e keni materialin e ndryshuar dhe kërkojmë nga ju aprovimin e këtij vendimi.

Burim Krasniqi: Përshëndetje kryesues, ekzekutiv, kolegë asambleistë, përfaqësues të KFOR-it, nxënës prezent. Drejtor, në seancën kur është votuar Plani i Mobilitetit dhe Plani për Transport, kam kërkuar të largohen nga rendi i ditës me arsyetimin që nuk janë dokumente formale, por janë dokumente të rëndësishme për komunën dhe kërkojnë më shumë rëndësi dhe kohë për shqyrtim. Nuk i keni trajtuar me rëndësi, sepse edhe baza ligjore ka gabime, kurse dokumenti brenda mund të jetë gjithçka, por serioz jo. Janë dokumente të zbrazëta dhe tendenca vetëm që të kalojë tutje diçka, për mua është e paarsyeshme. Për fushën që unë i takoj, dokumentet më të rëndësishme janë Plani i Transportit dhe i Mobilitetit dhe ju kërkoj të jemi serioz në këtë drejtim.

Përparim Krasniqi: Faleminiderit Burim! Të kam ftuar zyrtarisht nëpër diskutime publike për këto dokumente. E ke pasur mundësinë të japësh mendime dhe sugjerime dhe e di që je ekspert në këtë fushë. Plani i Transportit Rugor ka kaluar ligjshmërinë, ndërsa Plani i Mobilitetit ka pasur një mungesë të vëmendjes nga grupi punues për këto

Rekomandime në këto tri ligjet e para që kanë pësuar ndryshime, ndërsa në përmbajtje të Planit të Mobilitetit nuk kemi pasur as edhe një vërejtje.

Burim Krasniqi: Fiskulturat politike të mira janë ndonjëherë, por jo gjithmonë. Në asamble komunale jam për kontribut këtu. Për punë të tjera, janë zyrtarët e tjerë. Me shumë përgjegjësi e them që të dyja dokumentet janë të zbrazëta dhe nuk je inxhinier i komunikacionit, nuk e kupton fushën dhe nuk e di që e ke pyetur prej profesionistëve.

Ilir Pallqa: Te Plani i Mobilitetit, nuk po flas për pjesën ligjore shumë, por për gjendjen faktite që e kam lexuar. Këtu jemi të informuar sado pak për gjendjen momentale, por jo për zgjidhjen e problemit. P.sh. te trafiku për këmbësorë është cekur që ka shumë mungesë të trotuareve dhe rruga që të çon në drejtim të Shkollës së Mesme “Xhelal Hajda” është specifikuar si shumë problematike. A do të funksionalizohet rruga njëkahore më shpejt në atë rrugë, apo do të vazhdojë diskutimi derisa të ndodhë ndonjë aksident fatal. Gjithashtu, në fshatra të komunës, ka shumë mungesë të trotuareve, kryesisht rrugët që të çojnë në drejtim të shkollës. P.sh. (Vrajakë). Te shtegu i biçikletave (rruga për Hamoc), gjerësia e shtegut është 60cm, kurse biçikletat me dy rrota janë zakonisht 60-70 cm të gjera dhe nevojiten 20 cm shtesë për ta ruajtur ekuilibrin. Gjerësia, faktikisht, duhet të jetë minimumi një metër. Gjerësia më e vogël ndikon në çekuilibrim, vështirëson vozitjen dhe lë hapësirë për aksident. Te përshtatja e infrastrukturës për biznese, keni menduar që bizneseve t’i ofroni mundësi legale për vendosjen e automjeteve në trotuar, a e keni menduar zgjidhjen që të mos keqpërdoret kjo mundësi?... Së fundi e keni caktuar një zyrtar për mobilitet urban. Pse nuk e keni caktuar më herët?... Po harroni që drejtorët në ekzekutiv nuk janë për të kryer punë robotike, por duhet ta lodhin trurin pak. Ju jeni në pushtet që 8 vjet dhe Rahoveci për nga zgjidhja problematike dhe të mobilitetit është i njëjti që 10 vjet, nuk keni bërë asgjë. Komunitet e tjera, bagerat e kamionat i kanë në terren, në Rahovec është qetësi absolute, e frikshme.

Përparim Krasniqi: Faleminderit Ilir, sa për info., nuk je fokusuar mirë dhe nuk e ke lexuar sa duhet dokumentin. Plani i Mobilitetit përfshin zonën urbane dhe jo zonën që përfshihet jashtë qytetit të Rahovecit. Rruga Rahovec – Fortesë nuk është në Planin e Mobilitetit, gjithashtu as shtegu i biçikletave. Sa i përket Planit të Mobilitetit, pas vendimit të kuvendit, caktohet zyrtari për menaxhim, nuk mund të bëhet para vendimit. Në rrugën “Gëzim Hamza” dhe “Xhelal Halda” do të ketë punime shtesë në infrastrukturë, para se të vendoset në Plan të Mobilitetit.

Ilir Pallqa: Është mirë që drejtori mos të flasë me arrogancë, këtu është për të dhënë përgjegjësi. Projektin e kam lexuar të tërën. Te pika e trafikut për çiklist është e përshkruar dhe shtegun dje e kam matur (është 60cm) dhe 60cm është vetëm gjerësia e biçikletës. Po flas pa arrogancë, me qetësi dhe dashuri.

Merisa Sharku: Përshëndetje për të gjithë! Gjatë shfletimit të Planit të Mobilitetit, shihet që strategjitë i keni të mira dhe shpesh e kam cekë që punët i bëni vetëm për tik-at. Punën kur e bëni duhet ta përfundoni në mënyrë të dukur. Këtu ceket që rrugët janë të asfaltuara me kualitet të lartë. Rrugët e qytetit janë totalisht të shkatërruara, për fat jam shofere dhe duke vozitur duhet shmangur gropave të shumta. Jeni munduar të bëni diçka në lidhje me personat me aftësi të kufizuara, por punët janë përfunduar në mënyrë jo të duhur. I kemi edhe disa foto të cilat janë për “meme”.

Kryetari: Plani i Mobilitetit është miratuar në kuvend të komunës. Me qetësi, respekt, pa arrogancë dhe me simpatinë më të madhe ju ftoj të jeni të përkushtuar dhe të angazhuar kur bëhet fjalë për dokumente të cilat kanë peshë të madhe. Natyrisht që ne angazhojmë edhe shumë ekspertë të cilët janë për këto punë dhe drejtori ka detyrën e menaxhimit të të gjitha atyre ideve pozitive dhe të kontributeve të veçanta që i japin ata. Edhe ti Merisë je profesioniste e fushës dhe pse jo, ta jepni mendimin tuaj me kohë në të gjitha çështjet të cilat lidhen me aspekte rreth një infrastrukture sa më moderne. Projekti për të cilin fole ti, ka pasur vlerësime shumë të mira nga DEMOS-i. Ndërsa Iliri ka nisë të bëhet më aktiv tani, ditë më parë ka pushuar sado pak. Para se të vijmë këtu në kuvend, pse jo, mund të japë edhe ide të tjera dhe nuk kemi **pritëse** për akceptim.

Merisa Sharku: Kryetari në shpjegim, tha që kemi marrë vlerësime nga DEMOS-i, por pak mund të ketë lajthitje gjatë implementimit. Më e rëndësishme, sipas meje, është rezultati final në terren. Sa i përket kontributit tonë, kemi dhënë kontribut në rastin e sheshit në qendër, në fund, këshillat tona nuk po dëgjohen. Një çështje tjetër te sheshi në qendër, the që do të provojmë ta bëjmë rrugën aty afër, një - kahore. Mirë është që kjo çështje të mendohet mirë, sepse ka shumë ankesa prej qytetarëve që mos të bëhet një - kahore.

Kryesuesi: Unë jam që diskutimet të zhvillohen, por diçka që është dashur të diskutohet në pikën e dytë, mund të diskutohet në po atë pikë. Nuk do të kthehmi pas, të pathënat mund t’i diskutojmë në seancën e radhës.

Kryetari: Tani bëhet fjalë për plotësim - ndryshim të Planit, në mënyrë që ky plan të jetë në përputhshmëri të plotë me bazën ligjore. Sfidat e implementimit mund të jenë çdo herë, sepse edhe operatorët mund t’i kenë sfidat e veta.

Punët në sheshin në qendër nuk kanë përfunduar dhe rruga njëkahëshe nuk bëhet pa ekspertizë. Çrregullimi ka të bëjë më shumë me elementin e papërgjegjshëm që i parkojnë makinat aty dhe mungesën e veprimit të mjaftueshëm të policisë në atë pjesë.

Kryesuesi: Faleminderit kryetar! Atëherë, pikën e tretë të rendit të ditës po e vendosim në votim. Kush është “për”?... Abstenim?... Kundër?... Me 21 vota “për”, një abstenim dhe një kundër, kalon plotësim - ndryshimi i Planit të Mobilitetit Urban 2022 - 2027.

4. Shqyrtimi dhe miratimi i propozim – vendimit për ndryshimin dhe plotësimin e vendimit 01 Nr.404/22, i datës 28.12.2022, për miratimin e Planit të Vlerësimit të Rrezeve nga Fatkeqësitë Natyrore dhe Fatkeqësitë e Tjera për Komunën e Rahovecit;

Përparim Krasniqi: Faleminderit kryesues! Paraprakisht faleminderit për votimin e ndryshim - plotësimit të planit të mobilitetit. Sa i përket dokumentit të vlerësimit të rrezikut, ju njoftojmë që nuk ka pasur gabime në ligjshmëri, gabimet kanë qenë në strukturimin e këtij dokumenti. Komuna e Rahovecit është komuna e parë në nivel vendi që e ka kaluar këtë dokument, komunat e tjera janë në proces.

Sejfullah Sejfullahu: Faleminderit kryesues, përshëndetje për të gjithë! E vlerësoj materialin e Planit të Mobilitetit, por nuk mund ta bëj një vlerësim brenda ditës, sepse materiali ka ardhur dje.

Përparim Krasniqi: Ne e kemi kërkuar një sqarim prej Agjencionit të Menaxhimit të Emergjencave (AME), por dje na kanë konfirmuar në telefon që për shkak të ndërrimit të objektit edhe nuk kanë pasur mundësi ta dërgojnë e-mailin zyrtar. Ky dokument zyrtarisht ka kaluar, vetëm duhet të jetë i ndarë në tri pjesë.

Burim Krasniqi: Kryesues, e kam një pyetje për juve. A po ndiheni keq, me të gjitha këto rishqyrtime të vendimeve?

Kryesuesi: Faleminderit për pyetjen! Në seancën e parë të këtij viti kalendarik, në raportin vjetor kanë qenë gjithsej 7-8 vendime, janë kthyer në rishtyrtim të ligjshmërisë. Në takimet e rregullta me kolegjiun e kryesuesve, Komuna e Rahovecit qëndron më së miri në këtë aspekt të rishqyrtimit. Atëherë nëse dikush tjetër prej anëtarëve nuk ka ndonjë koment?... Po e vendosim në votim. Kush është “për”?... Me 20 vota “për” miratohet edhe plotësimi i Planit të Vlerësimit të Rrezeve nga Fatkeqësitë Natyrore dhe Fatkeqësitë e tjera.

5. Shqyrtimi dhe miratimi i ndryshin plotësimit të Rregullores 01 Nr.05/23 të datës 30.01.2023 për Ndryshimin dhe Plotësimin e Rregullores për Taksa Komunale 01 Nr. 80/20 e datës 29.06.2020, e ndryshuar dhe e plotësuar me Rregulloren 01 Nr. 169/21 të datës 26.02.2021;

Erhan Morina: Faleminderit kryesues! I nderuar nënkryetar, drejtorë, anëtarë të kuvendit, media. Në seancën e janarit të këtij viti, është votuar plotësim - ndryshimi i rregullores me nr.80/20 për taksë dhe tarifa. Ky dokument në parim është miratuar nga MAPL-ja. Kërkesë e Ministrisë së Bujqësisë ka qenë që të shtohen edhe dy paragrafë të tjerë, rreth caktimit të tarifës për prerjen e pyjeve private dhe caktimi i tarifave për kullosa. Si komunë jemi të obliguar t'i inkorporojmë këto tarifa në rregullore.

Kryesuesi: Faleminderit drejtor! A ka dikush diçka për të diskutuar rreth kësaj pike?... Nëse jo, atëherë po e vendosim në votim. Kush është “për”?... Me shumicë unanime, miratohet edhe pika e 5-të e rendit të ditës.

6. Shqyrtimi dhe miratimi i propozim-vendimit për faljen e borxheve të papaguara për taksat në aktivitete (afariste), nga data 1.1.2000 – 31.1.2017;

Erhan Morina: Të nderuar anëtarë të kuvendit, para jush keni materialin e propozim - vendimit për faljen e borxheve të papaguara të taksave afariste, bëhet fjalë për të gjitha borxhet e akumuluar nga viti 2000 deri më 31 dhjetor 2017. Drejtoria për Ekonomi, Zhvillim dhe Turizëm, propozon që këto borxhe të falen me qëllim që ky borxh i “keq” mos ta ngarkojë performancën komunale. Bizneset me këtë borxh aktualisht janë fiktive (pa pronarë), inkasimi i këtyre mjeteve pothuajse është i pamundur.

Kryesuesi: Në mbledhjen e KPF-së, si kryesues, kam kërkuar që në seancën e rregullt të bashkëngjitet materiali, por drejtori e ka parë të arsyeshme që ta thotë gojarisht.

Burim Krasniqi: Drejtor, the që borxhet janë të akumuluar prej bizneseve që sot nuk janë funksionale. A ka biznese funksionale që kanë borxhe?... Edhe këtyre jofunksionale që iu falet borxhi deri në 2017, a do ta kenë kusht që pjesën tjetër ta barazojnë?... Në vendim nuk po shoh diçka të ngjashme. Mendoj që duhet të jetë edhe një nen tjetër ku kërkohet që të lshyhen borxhet tjera 2017-2022. Nuk jam ekonomist me profesion, por mendoj që bizneset duhet të obligohen që ta paguajnë borxhin 2017-2022 si kriter për faljen e borxhit 2000-2017.

Sinan Kryeziu: Faleminderit kryesues, përshëndetje për të gjithë të pranishmit! I inkurajoj për votim në këtë pikë

sepse nga ana ligjore konsiderohet parashkrim. Te personi juridik, parashkrimi, sipas ligjit, është 3 vjet. Te personi fizik është 1.5 vjet. Personi juridik ka të drejtë të bëjë prapësim në përmbarim, nëse kemi propozim për përmbarim.

Leonard Morina: Përsëritet kryesues, nënkryetar, kolegë, drejtorë, media! Meqenëse ky material nuk është i kompletuar, nuk jemi në dijeni sa firma janë, sa është shuma e faljes, a ka firma që ekzistojnë?... Nëse është vetëm te performanca, besoj që nuk është në rregull vetëm për performancë ta dëmtojmë komunën në buxhet në këmbim të një letre të mirë.

Lirigzon Kastrati: Faleminderit kryesues, të nderuar anëtarë! Sa i përket kësaj pike, dua ta pyes drejtorin pse kanë lindur këto borxhe? ... A janë marrë veprimet e nevojshme ligjore para se këto borxhe të akumulohen?... Realisht duhet të njoftohemi të gjithë që komuna kërkon faljen e borxheve të cilat e kanë humbur afatin ligjërisht. Kjo është çështje politike, sepse këto borxhe nuk mund të inkasohen. Më pëlqeu propozimi i shefit, z. Burim, që të vazhdohet me një procedurë për faljen e borxheve që bizneset që kanë borxhe deri në vitin 2017, duke përfutur nga ky vendim i kuvendit, t'i paguajnë borxhet pas 2017-tës.

Ilir Pallqa: Faleminderit kryesues! Nuk kam pyetje, kam thirrje. Falja e borxheve nga ana e Komunës është thirrje për mosrespektim të institucionit, mosbindje ndaj përgjegjësisë që e ka secili që i gëzon asetet komunale, destimulim për ata që i kanë paguar borxhet. Sinqerisht, e pakuptimtë falja e borxhit nga Komuna. Privatistët mund të falin borxhe, jo si përgjegjës publik. Pastaj, çfarë dobie ka Komuna me faljen e borxheve ndaj afaristëve?... Duhet ta kemi parasysh që afaristët që i kanë lokalet komunale, qiratë i kanë më të ulëta sesa këta që i kanë lokalet private. Me këtë rast, po bëhet padrejtësi për shkak të dallimit në pagesë, kësaj ia shtojmë mospagesën dhe në fund faljen e borxhit. Borxhet nuk duhet të falen, duhet të ndëshkohet vonesa e borxhit.

Burim Krasniqi: Drejtor, nuk kam pa prej praktikave deri sot, që komuna iu dërgon bizneseve fletëdërgesë për borxhe që i kanë për taksa komunale. A ka ndodh në mandatin tënd t'i dërgoni (fatura)?...

Sejfullah Sejfullahu: Faleminderit kryesues! Është mirë që t'i falni borxhet deri në 2020 se m'u drejtua edhe mua. Kryesisht borxhet e mia janë pas 2018-tës. Në komunën tonë, 4-5 kompani ia shohin "hajrin" komunës, ne të tjerët jemi të ndëshkuar, kështu që është mirë deri në 2020-tën të jetë ky vendim.

Rasim Fazliu: Faleminderit kryesues! Unë jam "për" faljen e borxheve të këtyre taksapaguesve afaristë të Komunës së Rahovecit. Mendoj që para faljes së borxhit, drejtori duhet të na bje listën e borxhlinjve dhe shumën e borxhit, pastaj e shikojmë vlerën edhe e kryejmë veprimin. Meqenëse sot nuk mund të na siguroni këto të dhëna, atëherë këtë pikë është mirë ta shyejmë për trajtim për mbledhjen e radhës.

Erhan Morina: Faleminderit për të gjithë që parashtruat pyetje! Aktualisht, në Komunën e Rahovecit, janë të regjistruara 4216 biznese, që nga viti 2000 deri më sot, 1800 prej tyre janë aktive, 1712 janë pasive, 688 është numri i bizneseve të shuara. Bëhet fjalë për një borxh të bizneseve, me rreth 57% janë pasive ose të shuara, vlera e këtij borxhi është rreth 509.000 euro. Ky problem është analizuar shumë mirë dhe fare nuk ka të bëjë me çështje politike, por ka qenë rekomandim prej auditorit të jashtëm.

Kryesuesi: Faleminderit drejtor! Pa ndonjë qëllim të keq, besoj që informata më të hollësishme është dashur të kenë secili anëtar në formë të shkruar. Atëherë, fillimisht propozimin e Rasim Fazliut për shtyerjen e kësaj pike të rendit të ditës, që t'i bashkëngjitet materiali shtesë në seancën e ardhshme. Kush është "për"?... Atëherë me 15 vota "për" dhe 14 kundër, kalon propozimi i Rasim Fazliu dhe kjo pikë shtyhet për në seancën tjetër.

7. Shqyrtimi dhe miratimi i vendimit për shfuqizimin e vendimit 01 Nr.149/2006, i datës 14.07.2006;

Erhan Morina: Faleminderit kryesues! Para jush keni materialin për shfuqizimin e vendimit Nr.149/2006, i datës 14.07.2006 për dhënien në shfrytëzim në kohë të caktuar prej 10 vitesh, të pronës së paluajtshme të Komunës, ky vendim është i skaduar dhe nuk prodhon ndonjë efekt juridik, por shfrytëzuesi i deritanishëm nuk i përgjigjet ftesës sonë sepse nuk gjendet në Kosovë, kërkojmë ta shfuqizojmë dhe të vazhdojmë me procedura të tjera për ta futur përsëri në ankand publik.

Burim Krasniqi: Faleminderit drejtor! E the edhe vetë që vendimi nuk ka efekt juridik, pse ka nevojë të votohet, në momentin që kanë kaluar 10 vjet, ky vendim shfuqizohet me automatizëm. Këtu mund të vije propozim - vendimi për shpalljen në ankand të parcelës dhe jo të shfuqizojmë vendim që ka efekt juridik. E paarsyeshme kjo punë. E keni edhe Sinanin në grup të asambleistëve, mund t'ju ndihmojë sado pak, sepse si jurist e respektoj shumë. Në qoftë se zyra ligjore thotë që duhet të shfuqizohet, atëherë pajtohem, por unë konsideroj që një vendim pa afat nuk ka logjikë ta votojmë edhe një herë.

Isak Hoti: Faleminderit kryesues! Ai që e ka marrë në shfrytëzim në vitin 2006, ka qenë i kujdesshëm në çdo aspekt, duke përfshirë këtu edhe marrjen e kontratës, që tanimë nuk e dimë ku është. Jemi të obliguar që në kadastër ta largojmë shfrytëzuesin. Shfrytëzuesin aktual nuk mund ta largojmë pa e pasur vendimin për prishje të kontratës. Në këtë rast ne nuk kemi kontratë. E vetmja që kemi është një vendim. Ai ka tentuar që edhe palës së tretë t'i japë në shfrytëzim, gjë që ligji e ndalon një gjë të tillë. Tani, në mungesë të kontratës, jemi të obliguar ta marrim një vendim për shfuqizim të këtij vendimi dhe pastaj i fillojmë procedurat për ta dhënë në shfrytëzim.

Burim Krasniqi: Meqenëse është 10 - vjeçar, a shfuqizohet me automatizëm vendimi, kur të kalojë data e afatit të shfrytëzimit?... Konsideroj që Drejtoria për Gjeodezi dhe Kadastër, ka mundur automatikisht pas kalimit të afatit (më 15.7.2006).

Isak Hoti: Në vitin 2006, kur ia ka dhënë komuna pronën atij, ka qenë e thatë (lëndinë). Sot, aty i kemi dy objekte pa leje ndërtimore, e keqja e kësaj është që edhe pajisjet milionëshe janë brenda, pajisje të cilat iu kanë shitur palës së tretë. Këtë gjendje duhet ta analizojmë në mënyrë më të mirë të mundshme, hapi i parë është ky, hapi i dytë është për dhënien në shfrytëzim për palën tjetër. Dy objektet që janë aty, me marrjen e këtij vendimi, kalojnë automatikisht në pronë të komunës, sepse nuk kanë leje ndërtimore. Nëse eventualisht, nëse objektet do të ishin me leje, Komuna duhet t'i kompensonte.

Kryesuesi: Isak, meqenëse i ka kaluar afati kohor, pse tani pas 6 vitesh, Kuvendi Komunal duhet ta marrë një vendim të tillë?...

Sejfullah Sejgullahu: E kanë lënë deri tani, sepse "ne jemi legjislacioni më inteligjent".

Isak Hoti: Është një djalë i papërgjegjshëm që ne nuk po mundemi ta gjejmë, aq i kujdesshëm ka qenë, sa që i ka vjedhur edhe kontratat që i kemi pasur në Komunë. E kemi vetëm një vendim të Kuvendit që ne duhet ta shfuqizojmë, sepse nëse fillon një procedurë gjyqësore, do të kemi probleme në pafundësi. Si përfundim, pas konsultave me komunat që kanë pasur situata të ngjashme, proceduralisht duhet ta bëjmë shfuqizimin e vendimit, sepse komuna përfiton duke mos e dëmtuar askënd.

Burim Krasniqi: Të dëgjova me vëmendje dhe e njoh problemin mirë. Asetet që janë brenda, janë asate të lëvizshme që i takojnë palës, komuna nuk ka të bëjë me ato makineri. Ne sot mund ta shfuqizojmë këtë vendim që i ka dalë afati, për të cilin nuk jam "pro" dhe nesër ta vendosim në ankand, për çka?... për t'i dhënë në shfrytëzim objektet pa leje ndërtimi?... Ka procedura të tjera para se të vijmë te ankandi. A ka paguar qira ai, pas vendimit deri më sot? ... Nuk është e thjeshtë, është shumë e komplikuar. LDK-ja nuk e voton këtë vendim.

Bejtullah Deliu: Faleminderit kryesues! A po na krijon tani kjo një precedent tjetër ndërkohë. Në rastin konkret, kjo i bie që "merre token në shfrytëzim, ndërto, e më vonë e bëjmë legalizimin" d.m.th kanë kaluar shumë vite dhe nuk është ndërmarrë asnjë hap. Përgjegjësi të madhe kemi si kuvendarë e sidomos ekzekutivi i komunës.

Sejfullah Sejgullahu: Me para, nëse e shfuqizojmë dhe ia japim dikujt në ankand, problemet që janë në atë objekt, e bëjnë që askush tjetër mos ta marrë. Duhet të jemi në dijeni nëse është ndonjë marrëveshje që e kanë bërë ata, por në fund nëse nuk ekziston marrëveshja, lëreni të rrijë ashtu siç është, qiraja ec tutje dhe në fund Komuna ia konfiskon shkaku i qirasë.

Sinan Kryeziu: Sa e kuptova nga parafolësit, kjo nuk qenka çështje civile por penale (mashttrim). Nuk e di a është bërë kallëzimi penal. Në momentin kur është në kontekst në mes të dy palëve apo palës së tretë, duhet të vendoset një masë sigurie, kjo është çështje e gjyqësorit, jo e asamblesë. E pyes Isakun nëse ka shkresa nga ana e gjykatës.

Rasim Fazliu: Faleminderit kryesues. Unë pajtohem me mendimet e kolegëve. Mendoj që të gjitha pronat komunale që jepen në shfrytëzim dhe kanë një afat të caktuar, duket që zyrtarët ligjorë t'i përcjellin këto afate, faktikisht, i bie që në 2016, i ka kaluar afati, tani jemi në 2023. Për mua është shqetësuese kjo, duhet përcjellë kontratat dhe në çastin kur t'i kalojë afati, të vije në Kuvend për ta ndërprerë ose vazhduar.

Isak Hoti: Sinan, nuk kemi nevojë me dërgu në gjyq, kur jemi duke kërkuar ta marrim vetëm tokën tonë (tokën e Komunës). Kërkojmë t'i marrim ato dy objekte atij (si aset i Komunës në të ardhmen), që ai i ka ndërtuar pa leje. Rreth çështjes se a duhet dikush t'i përcjellë këto kontrata, janë përcjellë me kujdes, por për shkak të problemeve, kemi qenë të obliguar që personit në fjalë, të cilin nuk mund ta gjejmë, ia kemi dërguar 3 ftesa, nuk është përgjigjur dhe tani nuk kemi nevojë ta pyesim se çka të bëjmë me pronën tonë, por si procedurë duhet ta përfundojmë dhe zhvillojmë, votojeni si vendim. Nëse dikush mendon që ka diçka prapavijë këtu, i pari që duhet të shkojë "aty ku nuk duhet", jam unë.

Ilir Pallqa: Sa herë po flet Isak Hoti, nuk e di pse, por çdo herë më duket që ka diçka me prapavijë.

Hasan Përboqi: Nuk mund t'i themi që e ka me prapavijë sepse ai është zyrtar ligjor dhe në këtë rast nuk duhet të kërkojmë interpretime prej tij nëse kemi dyshime.

Ilir Pallqa: Ne e dimë që ka gjëra faktike dhe juridike. Isaku, juridikisht është zyrtar ligjor, faktikisht është artist.

Kryesuesi: Faleminderit shumë, nëse edhe dikush nuk ka diçka për të thënë, atëherë po e vendosim në votim. Kush është "për"?... Kundër?... Abstenim?... Atëherë me 14 vota "për" dhe 15 kundër, nuk kalon miratimi i vendimit për shfuqizimin e vendimit 01 Nr.149/2006, i datës 14.7.2006.

Pas se të fillojmë me pikat e rendit të ditës, një njoftim për të gjithë anëtarët e kuvendit. Prej muajit mars, fillon raportimi apo deklarimi i rregullt i pasurisë. Këtë vit, Agjencioni Kundër – Korrupsion, deklarimin e ka bërë në mënyrë elektronike. Ju lus të gjithëve që në muajin mars ta bëni deklarimin e pasurisë në kohën dhe mënyrën e duhur, duke iu shmangur problemeve të ndyshme.

Kryetari: Përhëndetje për të pranishmit. E pata një detyrë tjetër dhe u informova që është hequr prej rendit të ditës, shfuqizimi i vendimit për dhënien në shfrytëzim në kohë të pacaktuar të një parcele. Zakonisht kur mungoj, dikush e shfrytëzon rastin dhe bën veprime të cilat kanë nevojë për sqarime. Ne kemi obligim ta shfuqizojmë me vendim kontratën e skaduar të një parcele e cila është në shfrytëzim, e lidhur më 2006 (në kohën kur ka qeverisur LDK). **Gëzim Shala** e posedon në shfrytëzim i cili është jashtë vendit dhe nuk e dimë se ku është, i njëjti vazhdimisht i ka nxjerrë telashe komunës. Dikush e ka zhdukur kontratën. Meqë kontrata për atë objekt nuk ekziston, ne jemi të obliguar ta shfuqizojmë vendimin sepse nuk ekziston kontrata më për atë objekt. E ftoj edhe një herë Kuvendin e Komunës që ta rikonsiderojë edhe një herë këtë pikë të rendit të ditës, sepse ne duhet t'i japim përgjigje juridike si organe kompetente – ligjërish. Shfrytëzuesi aktual ka investuar shumë aty, por ne nuk guxojmë ta vazhdojmë marrëdhënien e jashtëligjshme me shfrytëzuesin aktual, i cili ka bërë transaksion me shfrytëzuesin e parë. Shfrytëzuesi i parë, tashmë, nuk ka asnjë lloj adrese. Ju ftoj ta riktheni pikën dhe ta votojmë shfuqizimin për të vazhduar me procedura të tjera ligjore - administrative.

Kryesuesi: Faleminderit kryetar! Pas këtij propozimi, tashmë është bërë precedent edhe në seancat e kaluara, i ftoj shëfat e grupeve për fjalë.

Burim Krasniqi: Faleminderit kryesues! Kryetar, si me qenë prezent ju, si mos me qenë, qëndrimin tim e them ashtu siç është. Problemin me "fenomenin" Gëzim, e dimë. Nuk jemi të interesuar që çëshjen ta lëmë pezull e të presim që të lajmërohet ndonjëherë ndonjë "Gëzim". Është e palogjikshme ta shfuqizojmë një vendim të cilit i ka skaduar afati para 7 vitesh. Nuk e di që ka jurist edhe thotë që, shfuqizoni një vendim, i cili nuk ka afat. Kur të vije propozimi përshpalljen në ankand, LDK-ja e voton.

Kryetari: Edhe unë jam ithtar i pikëpamjes që nuk ka nevojë për shfuqizim, por ne gjithmonë duhet ta kemi planin B ose C, sepse aty kanë ndodhur investime dhe objekti është ndërtuar, shfuqizimi për ne është siguresë, e krijon një argument shtesë si masë mbrojtëse, Burim, kuvendi për ne është siguresë, është procedurë shumë normale dhe formale. Ju propozoj rikthimin e pikës në rend dite.

Rasim Fazliu: Faleminderit kryesues! Kur të miratohet rendi i ditës, çdo lëvizje që bëhet më pas, është e jashtëligjshme. Sa i përket kërkesës së kryetarit, me përgjegjësinë më të madhe i them që ne nuk jemi për mosmiratim të kësaj pike, mirëpo për shkak të dyshimeve dhe të paqartësive, pasi ka pritur 7 vite, duhet të presë edhe pak, që në mbledhjen e radhës, të vije komplet materiali dhe zotohemi që e votojmë, si dhe nuk është mirë të luajmë me dinjitetin e këshilltarit, herë e kthejmë pikën, herë jo, kjo është joserioze. E lus kryetarin dhe kryesuesin të vazhdojmë me pikat e rendit të ditës siç kanë qenë.

Kryetari: Me respekt e dëgjova Rasimin. Çuditërisht edhe unë se si ka pritur 7 vjet. Çdo pritje e mëtutjeshme "na hap dorezat". Nuk bëhet fjalë për mosrespekt, për në disa tema duhet të reagojmë me kohë. Informata të tjera në seancën e marsit nga Komuna nuk ka, sepse do të jetë i njëjti material. Urgjenca e shfuqizimit të vendimit është legjitime dhe e madhe.

Sejfullah Sejfullahu: Me sa e kuptova unë, kjo më tepër është punë e prokurorisë. Në dy apo tre raste i kemi rikthyer pikat, sepse është shumë e vërtetë që na keni bindur. Nuk jemi fëmijë që tani brenda një ore përsëri ta ndërrojmë qasjen, ta tërheqim votën. Pas një muaji edhe unë do të votoj "pro".

Kryetari: Unë e di që është hequr ajo pikë, por nuk është mirë, sepse ajo pikë është votuar në rend dite. Meqenëse është votuar, unë jo rastësisht kërkoj rikthimin për votimin e shfuqizimin e këtij vendimi.

Kryesuesi: Atëherë, anëtarët e kuvendit janë ata të cilët duhet të vendosin përsëri me votë. Kush është "për" rikthimin e kësaj pike në rend dite?... Kundër?... Si kryesues i Kuvendit Komunal, rreshtohem me anëtarët e kuvendit

Pët'i krijuar zgjidhje situatave jo të favorshme. Pavarësisht arsytimit dhe informatave që i dëgjova, unë votoj kundër që kjo pikë të rikthehet në rend dite për sot.

Kryetari: E di që në këtë rast, vota kundër është votë e papërgjegjshme dhe e di që kjo situatë nuk do të jetë në seancat e ardhshme. I falënderoj Rasimin edhe Burimin, të cilët kanë qenë mirë të informuar për këtë çështje dhe kanë kontribuar që kjo pikë të hiqet. Kryesuesi duhet të jetë në dijeni që vota e tij e dyfishtë nuk duhet të anojë veç në Kuvendin e atyre që e kanë zgjedhur, sepse të njëjtit mund ta shkarkojnë dhe ta zgjedhin një tjetër. Ne kemi nevojë për një kryesues kompetent.

Rasim Fazliu: Kryetari i nderuar, kuvend më të përgjegjshëm se ky, nuk ka në gjithë Kosovën, prandaj duhet të keni konsideratë në këtë që po flas. Ishin shumë korrektë, konkretë, jotendenciozë, pa ngjyra politike dhe do të ishte serioze për kuvendin nëse do të ishte rikthyer pika. Në mbledhjen e radhës, u zotua për shqyrtim dhe do ta kalojmë. Të ftoj për respekt në mënyrën e njëjtë, siç ne jemi me juve. Pajtohem 100% që pronari – Gëzim, vërtetë është një matrapaz, sepse edhe në legjislaturat e kaluara kemi pasur kontakt me të. Ka kërkuar një sipërfaqe në shfrytëzim, nuk ia kemi dhënë për shkak të këtyre zhvillimeve që kanë qenë etj.. etj.. Do ta votojmë në mbledhjen e radhës.

Kryetari: Së pari nuk më keni mirëkuptuar. I keni hequr dy pika të rendit të ditës, njërin për mungesë shënimesh, që është shumë në rregull. Për pikën e dytë, këtu nuk është mirëkuptuar mirë. Vonesat na kushtojnë, zotëria nuk ka kontratë. Ai ka nevojë për sqarim, mos të vonohet ankandi.

Burim Krasniqi: Unë nuk e shfrytëzoj rastin e mungesës së dikujt. Te kontrata, përgjegjësia është individuale, jo politike edhe prindi im (baba Skenderi) nëse është dhe nëse e ka zhdukur, duhet të japë përgjegjësi ligjore. Burim Krasniqi si individ, ka mendim të kuartë, nuk e voton shfuqizimin me afat të skaduar, sepse nuk mund ta bindë veten të shfuqizojë diçka që nuk ka afat. Nuk ka efekt juridik, është nul.

Kryetari – Ju lutem, kryesuesi është kompetent t'i udhëheq takimet e kuvendit, ju po e bëni inkompetent duke u munduar ta dirigjoni, kështu nuk është mirë. Burim Krasniqi kurrë mund të mos bindet me vetëveten, nuk i kam faj për këtë punë. Kemi konsultuar zyrën ligjore dhe jurista tjerë, sepse nesër zotëriu mund ta bëjë një padi dhe ky tjetër këtu që ia ka blerë atij. Argumentet tona duhet t'i fuqizojmë me kuvend të komunës si siguresë dhe ky le të voton kundër sa të dëshiron, është çështje e tij individuale.

Kryesuesi: Faleminderit kryetar, vazhdojmë me 5 minuta pauzë dhe rikthehemi...

Atëherë përshëndetje edhe një herë për të gjithë! Meqenëse kryetari nuk është këtu, besoj që i tregoni. E tha që kryesuesi nuk ka konstruktivitet, kjo është e padrejtë. Në çdo seancë, 80% e pikave votohen nga kryesuesi. Pavarësisht kësaj, kryesuesi e ka të drejtën e votës së dyfishtë, që me arsyeshmërinë e plotë e merr kahjen, të cilën e sheh të arsyeshme, në bazë të arsytimit nga Kuvendi apo ekzekutivi. Konstruktivitet këtu nuk tregojnë anëtarët e Aleancës, bashkë me kryetarin që asnjëherë nuk tentojnë t'i kuptojnë anëtarët e tjerë të kuvendit komunal. Mua nuk më dirigjon askush, nga anëtarët e kuvendit i kam marrë shumicën e votave dhe vazhdoj të jem kryesues deri në momentin kur shumica e Kuvendit e sheh të arsyeshme që unë duhet t'i udhëheqi seancat, apo përfaqësimin e Kuvendit komunal në përgjithësi.

Kryesuesi: Atëherë, fillojmë me pjesën e mbetur të seancës. I nderuar nënkryetar, anëtarë të kuvendit, drejtorë.

8. Shqyrtimi dhe miratimi i propozimit për caktimin e komisionit për zgjedhjen e drejtorëve dhe të zëvendës drejtorëve në institucionet edukativo - arsimore;

Avni Morina: Bazuar në ligjin për arsim në komunat e republikës së Kosovës, në mbështetje të nenit 5, pika 3.1 e UA nr.151/2020. Procedurat e zgjedhjes, të emërimit, të përfundimit të kontratës dhe të emërimit të përkohshëm dhe duke u bazuar në këtë bazë ligjore, DKA-ja bën këtë propozim për antarë të komisionit përzgjedhës drejtorë apo drejtoresha, zëvendës drejtorë, zëvendës drejtoresha të institucioneve edukative - arsimore të komunës sonë. Propozimi është që të miratohen këta dy emra: Anëtar kryesues – Ardit Halilaj (zyrtar për arsimin e mesëm të lartë në DKA), Erseka Cana – anëtare e dytë – mësimdhënëse e programit fillor dhe anëtar i tretë përcaktohet nga MASHT-i. Kërkoj nga Kuvendi miratimin e këtyre propozimeve.

Lirigzon Kastrati: Të nderuar anëtarë të Kuvendit! UA-ja e përcakton funksionimin, përbërjen dhe procedurën për zgjedhjen e drejtorëve të shkollave. Anëtar i parë, apo kryetari i komisionit, është pranuar tani në punë dhe UA-ja kërkon (neni 7) përvojë tri - vjeçare në fushën e arsimit. Kërkoj sqarim nga ana e drejtorit.

Leonard Morina: I bashkëngjitëm parafolësit dhe është dashur ta keni nga një CV të anëtarëve dhe ta shikojmë përvojën e tyre të punës, sepse ne do t'i ulim disa drejtorë përballë tyre që të merren në intervistë. Ndoshta drejtori i

ka 30 vjet përvojë pune, me kualifikim dhe në fund të ulen përballë njerëzve që janë punësuar që 1 muaj. Me sa kam info., kryetari i komisionit paska punuar në Gjakovë në arsim, por nuk e di a e plotëson kushtin prej 3 vitesh. Përndryshe, rastet e tilla do të përfundojnë nëpër gjykata si rastet e tjera.

Rasim Fazliu: Faleminderit kryesues! Desha ta pyes drejtorin nëse ka pasur kandidatë të tjetër të interesuar për këtë komision, nuk e di anën ligjore, por do të ishte më mirë të kishte edhe kandidatë të tjerë e që kuvendi të ketë mundësi të zgjedhjes. U bashkëngjitem parafolësve në lidhje me atë që duhet ta kenë CV-në.

Avni Morina: Këta dy emra për anëtarë të komisionit janë propozuar nga DKA-ja, bazuar në UA-në për detyrat dhe përgjegjësitë e drejtorit dhe të zv. drejtorit të institucionit publik edukativo - arsimor dhe aftësues parauniversitar në Republikën e Kosovës. Kjo punë nuk ka shkuar përmes konkurseve. Në udhëzim administrativ (UA), nuk thuhet që DKA-ja duhet të paraqesë CV-në e kandidatëve, por duhet të jenë me kualifikim adekuat.

Burim Krasniqi: A jemi në rregull ligjërisht me këta dy emra të propozuara nga DKA-ja?...

Avni Morina: Mendoj që po, sepse UA thotë që duhet të jenë me kualifikim, të paktën të barasvlefshëm me kandidatët për drejtorë të shkollave.

Fahrije Lushi: Te kandidati i parë, Ardit Halilaj, nëse ka punuar në Universitet të Gjakovës, në cilën pozitë ka punuar?... Nuk do të kishte hapësirë për këto pyetje nëse kishin qenë edhe CV-të e kandidatëve.

Avni Morina: Ju kërkoni CV-të e kandidatëve, por UA nuk thotë që duhet të sillen në kuvend CV-të e kandidatëve. Por nëse ju kërkoni një gjë të tillë, unë mund t'i marr të dhënat për ta dhe t'ju prezantoj juve.

Burim Krasniqi: Drejtor, mos na keqkupto, personalisht nuk e njoh Arditin. Nëse i ka përvojë pune 3 vjet, sipas UA-së, jemi në rregull, nëse nuk i ka, mos ta emërojmë dikë që nuk i plotëson kriteret.

Kryesuesi: Faleminderit drejtor, derisa ta gjeni informatën, vazhdojmë me pikën tjetër dhe pastaj rikthehemi te kjo pikë.

9. Shqyrtimi dhe miratimi i propozim - vendimit për bartjen e mjeteve vetanake nga viti 2022, në vitin 2023;

Afrim Limani: I nderuar kryesues, kryetar, nënkryetar dhe ju asambleistë. Para jush e keni një propozim për bartjen e mjeteve nga 2022 në 2023, i cili bazohet në kuadër të ligjit të financave publike dhe përgjegjësi (neni 30). Shuma e mjeteve të bartura në total është 479.989.22euro. Në bazë të një analize të bërë nga Drejtoria për Buxhet dhe Financa, kemi bërë shpërndarjen e mjeteve, prioritet u kemi dhënë disa obligimeve financiare. Kemi ndarë rreth 60.000 për mallra dhe shërbime. Tjetër, ka qenë një kërkesë nga ana e asambleistit Rasim Fazliu, e kemi futur si projekt të ri dhe është fjala për ndërtimin dhe rregullimin e shtëpisë së kulturës në Celinë.

Lirigzon Kastrati: Rreth kësaj pike të rendit të ditës, pasi bartja e mjeteve është bërë në destinime të caktuara, megjithëse komuna ka mundur që ta përcaktojë radhën e përparësisë për projektet që janë më të nevojshme për qytetarët. Në të ardhmen, presim që planifikimet buxhetore dhe projektet kapitale të përfundojnë brenda një viti kalendarik dhe mos të krijohet për çdo vit suficit.

Rasim Fazliu: Faleminderit kryesues! Fillimisht e falënderoj Drejtorin e Financave për propozimin e bartjes së mjeteve nga 2022 në 2023. Drejtori e ceku propozimin tim. E falënderoj Kryetarin e Komunës, Drejtorin e Financave dhe Drejtorin e DKRS-së për këtë punë. Do ta votoj këtë bartje të mjeteve.

Burim Krasniqi: Te shpenzimet, një herë këqyret të shpenzohet granti qeveritar, më pas të hyrat vetanake, që mos të shkojnë në suficit, por ta kenë mundësinë e bartjes prej vitit në vit (është veprim logjik që e përdorin komunat). Janë disa pozita ose kode, rregullimi i varrezave në Celinë dhe Krushë të Madhe, vetëm 10.000 euro, ndërtimi i shtëpisë - muze në Krushë të Madhe, 25.000 euro. A janë këto obligime të punëve të kryera, apo...? Te mallrat dhe shërbimet - 60.000, te planifikimi urban dhe mjedisor, çka është menduar me këto në të ardhmen?...

Hasan Përboqi: Përshëndetje kryetar, kryesues, nënkryetar, kolegë, drejtorë, media! Ne, si grup i Aleancës, i ofrojmë mbështetje këtij propozimi të ekzekutivit. Propozimet e Drejtorit të Financave janë çdo herë me vend, sepse vetëm ai e di se ku janë punët më "ngushtë" dhe ku duhet paraparë mjetet.

Sejfullah Sejfullahu: Do ta votojmë bartjen, sepse gjërat e mira duhet t'i mbështesim. Faleminderit shumë për buxhetin e ndarë për shtëpinë - muze. Shpresojmë më shpejt t'ia fillojnë punimet.

Kryesuesi: Faleminderit! Dikush tjetër?... Nëse jo, atëherë po e vendosim në votim, kush është për?... Me shumicë unanime, aprovohet bartja e mjeteve vetanake nga 2022 në 2023... Nëse e ka gati informatën drejtori i DKA-së rreth çështjes së komisionit për zgjedhjen e drejtorëve dhe të zëvendës drejtorëve?...

Ami Morina: Atëherë, pas konsultimeve të bëra në DKA, rrjedh që kandidati i parë i propozuar për kryetar të komisionit nuk i paska 3 vjet përvojë pune, por vetëm 2.5 vite. Në përfundim erdhëm me një propozim tjetër: Vjollca Vuçitëma (Master - Kimi dhe përvojë mbi 10 - vjeçare në arsim).

Kryesuesi: Faleminderit drejtor! Atëherë, këtë pikë të rendit të ditës po e vendosim në votim, bashkë me propozimin e Kush është për?... Me shumicë unanime, aprovohet pika e tetë e rendit të ditës. Para se të vazhdojmë me pikën e 11-të të rendit të ditës, e kam një fjalë të shkurtër.

Kryetari: Fillova fjalimin, e kam ditur që informatën do t'ia dorëzoni kryetarit, por nuk ia keni treguar në formën e duhur. Kështu ka ardhur një keqkuptim mes kryetarit dhe meje, për një fjalë jo të mirë që e patëm mes nesh. Meqenëse është kështu, më lejoni ta qartësoj. Unë nuk jam duke qëndruar kryesues me zor, e respektoj secilën votë të secilit anëtar dhe përderisa unë e kam besimin e këtij Kuvendi, vazhdoj të jem kryesues, pavarësisht asaj që nuk është e rëndësishme këtu edhe sa do të jem kryesues. Maksimalisht që e kam respektuar deri tani ka qenë Kryetari i Komunës, respekt ky, që nuk ka qenë i ndërsjelltë. Kryetar, nëse mendon që mund ta zmadhosh grupin e Aleancës, i cili po zmadhohet shumë, por edhe zvogëlohet ndoshta, mund të marrësh hapa konkretë ligjorë për zëvendësimin e kryesuesit dhe besoj që e kam dëshmuar që nuk e kam asnjë problem në këtë aspekt.

Kryetari: Kryetari i Komunës nuk shkarkon, as nuk emëron kryesues. Nëse e kisha pasur këtë kompetencë, Defrim Kafehiu nuk do të ishte kryesues, sepse e kam njohur pas zgjedhjes anëtar i kuvendit dhe jo më herët. Mendoj që kryesuesi duhet të reflektojë ndjenjë të lartë të përgjegjësisë, të korrektësisë dhe të sinqeritetit, duhet të jetë i pavarësht dhe nuk duhet të merret me fushata e ideologji politike sepse është kryesues, si asambleist po, gjithmonë ka të drejtë. Të çmoj si djalë të ri, por karriera jote nuk duhet të ndërtohet me një pozicionim të tillë. Kuvendin e ftoj për më shumë pozitivitet dhe më pak inate.

Kryesuesi: Nuk besoj që mua më mbron Kryetari, vetëm një e them, që për djalë të mirë nuk më mban këtu, pavarësisht kësaj, kam respekt për çfarëdo iniciative që vjen për anëtarëve të kuvendit dhe që e shohin të arsyeshme me vendos ndryshe.

10. Shqyrtimi dhe miratimi i propozim-vendimit për dhënien e pronës në shfrytëzim afatshkurtër personave fizikë dhe juridikë dhe zhvillimin e procedurave të ankandit publik P-01952-1, zona kadastrale Ratkoc;

Erhan Morina: Faleminderit kryesues! Para jush keni propozim - vendimin për dhënien e pronës në shfrytëzim afatshkurtër personave fizikë dhe juridikë dhe zhvillimin e procedurave të ankandit publik P-01952-1. Bëhet fjalë për tregun ditor i cili gjendet në Ratkoc.

Kryesuesi: Faleminderit drejtor! A ka dikush diçka prej anëtarëve të kuvendit rreth kësaj pike?... Nëse jo, atëherë po e vendosim në votim, kush është "për"?... Me shumicë unanime miratohet pika e dhjetë.

11. Shqyrtimi dhe miratimi i propozim-vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme komunale P-01952-1;

Erhan Morina: Faleminderit kryesues! Para jush keni propozim - vendimin për formimin e komisionit, kjo pikë ndërlidhet me pikën paraprake. Duhet t'i zhvillojmë procedurat edhe të krijojmë komisionin prej 5 anëtarëve (2 nga ekzekutivi, 2 nga kuvendi, 1 nga sektori joqeveritar).

Kryesuesi: Po i ftoj grupet e asambleistëve që t'i japin propozimet e tyre.

Hasan Përboqi: AAK, ne propozojmë Feriz Thaqin.

Vlora Vuçitërna: LVV, ne propozojmë Leonard Morinën.

Edonë Kryeziu: LDK, propozojmë Lirigzon Kastratin.

Sejfullah Sejfullahu: PDK, nuk ka kandidat.

Kryesuesi: Faleminderit! Atëherë meqë kemi tre propozime, vazhdojmë me votim.

Rasim Fazliu: Mendoj që është mirë që VV dhe LDK të merren vesh që njëra një komision, tjetra një tjetër. Mos të shkojmë në votim, thjesht mendim personal, vazhdojmë.

Kryesuesi: Faleminderit shumë! Në mungesë të vullnetit, vazhdojmë me mënyrën e njëjtë të zgjedhjes së anëtarëve, sikurse më herët. Feriz Thaqi (AAK), kush është "për"?... Leonard Morina (LVV), kush është "për"?... Lirigzon Kastrati (LDK), kush është "për"?... Atëherë, si pjesë përbërëse e këtij komisioni, dy asambleistët më të votuar janë: Leonard Morina dhe Lirigzon Kastrati. Po e vendosim në votim si të tillë, kush është "për"?... Me 14 vota "për" miratohet pika e 11-të.

12. Shqyrtimi dhe miratimi i propozim - vendimit për dhënien e pronës në shfrytëzim afatshkurtër personave fizikë dhe juridikë P-02240-73, zona kadastrale Rahovec;

Afrim Oruqi: Faleminderit kryesues, para jush keni propozimin e kryetarit të komunës, për dhënien e pronës me qira personave fizikë dhe juridikë në afat prej 15 viteve P-02240-73 (2 ha, 50 ari e 99m katror), zona kadastrale Rihovec, qëllimi është zhvillimi i turizmit dhe i rekreacionit.

Kryesuesi: Faleminderit drejtor! A ka dikush diçka prej anëtarëve të Kuvendit rreth kësaj pike?... Nëse jo, atëherë po e vendosim në votim, kush është “për”?... Me shumicë unanime miratohet pika e dymbëdhjetë.

13. Shqyrtimi dhe miratimi i propozim - vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme komunale P-02240-73;

Afrim Oruqi: Faleminderit kryesues, para jush keni propozimin për komisionin i cili do t'i zhvillojë procedurat për dhënien e kësaj prone me qira (që aktualisht morëm vendim) P-02240-73, komisioni ka si zakonisht 5 anëtarë.

Kryesuesi: Faleminderit drejtor! Sikurse komisionet paraprake, edhe këtu janë dy prej kuvendit, i ftoj grupet e asamblesë për propozime.

Husan Përboqi: AAK, Feriz Thaqin.

Ilir Pallqa: LVV, e propozojmë Leonard Morinën.

Edonë Kryeziu: LDK, propozojmë Lirigzon Kastratin.

Sejfullah Sejfullahu: PDK, nuk ka kandidat.

Kryesuesi: Meqenëse përsëri i kemi tri propozime, vazhdojmë me votim. Feriz Thaqi (AAK), kush është “për”?...

Leonard Morina (LVV), kush është “për”?... Lirigzon Kastrati (LDK), kush është “për”?... Atëherë dy përfaqësues të

Kuvendit, në këtë komision, janë: Leonard Morina dhe Lirigzon Kastrati. Kush është “për” komisionin si të tillë?...

Me 15 vota “për” miratohet edhe pika e trembëdhjetë.

14. Shqyrtimi dhe miratimi i propozim – vendimit për caktimin e lokacionit për ndërtimin e objektit për zhvillimin e aktiviteteve për nevojat e komunitetit, të fshatit Kramovik P-00330-0;

Afrim Oruqi: Faleminderit kryesues, para jush keni propozimin për caktimin e lokacionit për ndërtimin e objektit për zhvillimin e aktiviteteve të ndryshme për nevojat e komunitetit në fshatin Kramovik P-00330-0, të ndajmë një pjesë të kësaj parcele për ndërtimin e objektit në sipërfaqe prej 4 ari.

15. Shqyrtimi dhe miratimi i propozim - vendimit për caktimin e lokacionit për ndërtimin e objektit për zhvillimin e aktiviteteve për nevojat e komunitetit të fshatit Polluzhë; - P – 00722-0;

Afrim Oruqi: Bëhet fjalë për parcelë me sipërfaqe prej 16 ari e 89 m katror P – 00722-0, ata kanë kërkuar prej neve që në sipërfaqe prej 2 ari, të caktojmë një lokacion me qëllim të ndërtimit të një objekti për nevojat e komunitetit. Ftoj anëtarët që t'i votojnë veç e veç të dyja pikat.

Rasim Fazliu: Faleminderit kryesues! E falënderoj drejtorin për prezantimin e këtyre dy pikave. Pyetja ime është nëse ka pasur kërkesë prej fshatit për këto gjëra dhe nëse po, pse nuk është materiali i bashkëngjitur i kompletuar?...

Afrim Oruqi: Faleminderit kryesues! Për të dyja propozimet ka kërkesa të fshatit Kramovik dhe Polluzhë, qëllimisht nuk i prezantojmë, sepse materiali shkon në MAPL për ligjshmëri dhe kërkesat i lëmë për konsum të brendshëm.

Kryesuesi: Faleminderit drejtor! A ka dikush diçka prej anëtarëve të kuvendit rreth kësaj pike?... Nëse jo, atëherë po e vendosim në votim, kush është “për”?... Me shumicë unanime miratohet pika e katërbëdhjetë.

Gjithashtu pikën e 15-të e prezantoi drejtori, nëse dikush prej anëtarëve ka diçka rreth kësaj pike?... Nëse jo, atëherë po e vendosim në votim, kush është “për”?... Me shumicë unanime miratohet pika e pesëmbëdhjetë.

16. Shqyrtimi dhe miratimi i vendimit për këmbimin e pronës komunale me pronë private P- 01041-1, zona kadastrale – Xërxë;

Afrim Oruqi: Sipas ligjeve në fuqi, para jush e keni materialin për pëlqim për këmbimin e pronës komunale me atë private. Vendi i quajtur Skeja në Xërxe (12 ari e 31m katror), e cila i jepet në posedim Hysni Vehbi Thaqit nga Xërxa. Prona private është 14 ari e 72m katror, i jepet Komunës së Rahovecit, në emër të këmbimit për hapjen e rrugës publike, me qëllim të interesit publik.

Kryesuesi: Faleminderit drejtor! A ka dikush diçka prej anëtarëve të kuvendit rreth kësaj pike?... Nëse jo, atëherë po e vendosim në votim, kush është “për”?... Me shumicë unanime miratohet pika e gjashtëmbëdhjetë.

17. Shqyrtimi dhe miratimi i Planit të Punë së Komitetit për Komunitete për vitin 2023;

Kryesuesi: Është formë formale që duhet ta kalojmë këtë plan për shkak të ligjit, atëherë kush është “për”?... Me shumicë unanime miratohet edhe Plani i Punës së Komitetit për Komunitete.

18. Raporti vjetor për kontratat e nënshkruara publike 2022 - Kontratat kornizë;

Astrit Mullabazi: Përshëndetje të nderuar! Sipas raportit vjetor të kontratave të nënshkruara publike 2022, gjithsej janë 27 kontrata publike kornizë. Këto lloj kontrata janë sipas rregullores dhe udhëzuesit operativ për prokurimin publik (neni 56). Kontratat kornizë, afatin e kanë jo më shumë se 36 muaj me devijim të lejuar plus-minus 30% (furnizime, shërbime, punë).

Burim Krasniqi: Faleminderit për raportin! Kam dy pyetje, e para: Kontratat kornizë a duhet të jenë të mbuluara financiarisht komplet?... E dyta: A ka kontrata kornizë që e kanë tejkaluar buxhetin, që ka borxhe pas 3 vitesh, (a janë shpenzuar më shumë sesa është paraparë).

Astrit Mullabazi: Sipas ligjit të prokurimit, kontratat kornizë bëhen me çmim për njësi, vlera totale indikative e kontratës publike kornizë, duke përfshirë plus - minus 30%, pa marrë parasysh datën e skadimit të kontratës.

Burim Krasniqi: Këto kontrata kornizë, a janë mbyllë të gjitha financiarisht, a ka komuna borxhe për kontratat kornizë, sepse ju e bëni menaxhimin e kontratave.

Astrit Mullabazi: Menaxhimin e kontratave kornizë e bën menaxheri i kontratës me vendim nga Kryetari i Komunës. Te kontratat kornizë nuk kemi borxhe, bëhet sipas porosive.

Vlora Vuçiterna Çmega: Përshëndetje për të gjithë! Dua të ndërlidhem te kontratat për furnizim me material mjekësor (ampula emergjente dhe material sanitar). Duke pasur parasysh vlerën jo të ulët të kësaj kontrate, nga ana tjetër duke e ditur koston e një ampule, që mesatarja është 20 cent, dyshimi im është rreth asaj se çka është duke ndodhur me menaxhimin e barnave ampulare në QKMF dhe pse pacienti detyrohet që në orët e vona të natës të kërkohet barnatore në kujdestari për një ilaç të tillë, përderisa QKMF-ja duhet ta ketë ilaçin për shkak të ndjeshmërisë së rasteve që ndodhin.

Astrit Mullabazi: Sa i përket kontratës së furnizimit të materialit shpenzues në QKMF, kjo kontratë është ndarë në 4 lott-e, furnizim me material reagenca shpenzues për laborator, furnizim me material reagenca shpenzues për stomatologji, furnizim me barna ampulare emergjente dhe materiale sanitare. Këtu është kontratë kornizë për shkak të asive.

Vlora Vuçiterna Çmega: Vlera e kontratës është 20.000 euro, një ampulë kushton vetëm 20 cent dhe përsëri të kemi mungesë në orët e vona sidomos në kujdestari, pak është e dyshimtë.

Kryesuesi: Faleminderit Astrit, Vlorë! Atëherë, nëse edhe dikush tjetër nuk ka diçka për të thënë rreth këtij raporti vjetor për kontratat kornizë, kalojmë te pika e 19-të.

19. Informatë mbi menaxhimin e aseteve për vitin 2022;

Erhan Morina: Si çdo vit kalendarik, Drejtoria për Ekonomi Zhvillim dhe Turizëm përgatit pikën informuese mbi menaxhimin e aseteve komunale. Gjatë vitit 2022, janë formuar këto komisione lidhur me pasuritë e Komunës së Rahovecit: Komisioni për regjistrimin e pasurive jofinanciare, komisioni për inventarizimin e pasurive jofinanciare, komisioni për tjetërsimin e pasurive jofinanciare dhe komisioni për asgjësimin e pasurive jofinanciare. Të gjitha këto komisione e kanë kryer punën me kohë, duke filluar nga procesi i regjistrimit të aseteve dhe inventarizimit në administratë, QKM dhe QKMF.

Burim Krasniqi: Raporti është shumë përmbledhës, por nuk ka vlerë për pajisje, p.sh: në tabelën e fundit thotë, kamionë ka 18.000 euro, duhet të jetë e specifikuar secili mjet për vlerën që e ka. Një komision po ashtu duhet të merret edhe me zhvlerësimin e vlerës ndër vite. Në pikën 19 dhe 20 të të njëjtës tabelë thotë: Vetura zyrtare (nuk ka vlerë monetare) dhe automjete të transportit (nuk ka vlerë monetare).

Erhan Morina: Sa u përket veturave zyrtare, veturat që i përdorë komuna janë jashtë standartit (të amortizuara 100% sipas vlerës së kontabilitetit).

20. Informatë nga DKA-ja për përfundimin e gjysmëvjetorit të parë të vitit shkollor 2022/2023;

Avni Morina: Përshëndetje edhe një here! Në këtë informatë kam paraqitur të gjitha aktivitetet e Drejtorisë së Arsimit gjatë gjysmëvjetorit të parë (katër muaj) të vitit shkollor 2022/2023. Me vendim të Ministrisë, periudhat janë kthyer përsëri me metodën e vjetër (2 periudha). Në informatë kam treguar faktin që, për ndryshim nga vitet e tjera, ky vit nuk ka filluar me kohë, ka filluar me 3 tetor 2022, për shkak të grevës që ishte e organizuar nga sindikalistët. Kam cekur faktin që, edhe pse është kërkuar nga Ministria e Arsimit për zëvendësimin e orëve të humbura (të zëvendësoheshin të shtuneve), kjo gjë nuk ka ndodhur. Në mënyrë kronologjike, kam paraqitur të gjitha aktivitetet që kanë ndodhur prej 3 tetorit deri më 27 janar. Është lidhur kontrata për objektin e ri të Shkollës Filllore të Mesme të Ulët "Hamëz Thaqi" Xërxë, është lidhur kontrata për projektin e ndërtimit të

aneksit të objektit të shkollës “Katër Dëshmorët” – Ratkoc. Në bashkëpunim me Drejtorinë e Shëndetësisë dhe Përkujdesjes Sociale, janë zhvilluar vizita sistematike shëndetësore te nxënësit e klasave të para dhe të pesta. Ka përfunduar fusha sportive në oborrin e shkollës “12 Maji” – Ratkoc. Ka përfunduar furnizimi me inventarë për objektin e ri të shkollës në Reti. Me 19 nëntor është mbajtur gara komunale e olimpiadës në matematikë. Në dhjetor rregulluam këndin e lodrave në oborrin e çerdhes për fëmijë “Tulipanët” në qytet. Është bërë përrurimi i objektit të ri të çerdhes në Xërxë. Janë kryer punimet e renovimit të brendshëm të shkollës “Bekim Sylka” për të cilën bëri pyetje edhe asambleistja Bjondina Kleqka.

Lirigzon Kastrati: Të nderuar anëtarë të ekzekutivit, kolegë të Kuvendit Komunal. Sa i përket informatës së DKA-së, pajtohem që këto informacione janë të nevojshme për Asamblenë Komunale për diskutim. Konsideroj që asamblesë duhet t’i ofrohen më shumë çështjet që lidhen me cilësinë e arsimit në komunën tonë. Për këtë çështje i kam disa pyetje: Sa ka qenë pjesëmarrja e rregullt e nxënësve në procesin mësimor? Sa inspektime janë bërë nga niveli komunal i DKA-së në mbarëvajtjen e procesit mësimor? Nëse DKA-ja i ka këto të dhëna dhe nuk janë të kënaqshme, atëherë na tregoni se çfarë masa janë marrë nga DKA-ja për ta përmirësuar cilësinë e arsimit në nivel komunal. Sa ka qenë suksesi i nxënësve i shprehur në % në këtë gjysmë-vjetor? ... Pyetjet e parashtruara mendoj që duhet të jenë pjesë e kësaj informate të DKA-së.

Avni Morina: Faleminderit Lirigzon! Mendoj që po të zgjerohesha më shumë do ta merrte karakterin e raportit. Përndryshe ne si DKA, vazhdimisht e përcjellim procesin mësimor dhe mbarëvajtjen e tij, mungesat e mësimit dhe të nxënësve, për këta të fundit, çdo fund të gjysmë-vjetorit, drejtorisë i vije raporti i shkollës. Kemi mungesë të inspektimeve profesionale nga inspektorët e arsimit, sepse kemi mungesë të kuadrit të inspektorëve në nivel regional. Sikur t’i përfshija në këtë informatë statistikën dhe suksesin e nxënësve, informata do të shndërrohej në raport, për çdo interes tjetër, në DKA, i kemi të gjitha shënimet.

Lirigzon Kastrati: Faleminderit drejtor! Meqenëse i keni këto informacione, kërkoj që, nëse e sheh të arsyeshme, të na dërgosh në e-mail.

21. Shqyrtimi dhe miratimi i propozimvendimit për ndërtimin e fushës sintetike për klubet e futbollit në Komunën e Rahovecit;

Afrim Dina: Faleminderit kryesues! Të nderuar anëtarë të kuvendit, jemi komuna e vetme e cila nuk ka një fushë sintetike, që federata e futbollit në bashkëpunim me komunat, i ndërton ato. Kemi pasur kërkesa nga KF. Anadrini, KF. Xërxa dhe në fund KF. Rahoveci, të cilët kanë kërkuar gjetjen e një parcele dhe rregullimin e një fushe sintetike. Nga Drejtoria për Gjeodezi dhe Kadastër, kemi marrë informacione se prona komunale kemi në Krushë, Celinë, Fortesë, Xërxë, Dejnë, Kramovik. Ne si komunë, konsiderojmë që parcela më e përshtatshme është në Xërxë (2 ha e 89 ari total), kërkojmë që të ndahen 1 ha e 40 ari për këtë fushë sintetike.

Kryesuesi: Faleminderit drejtor! A ka dikush ndonjë pyetje?... Nëse jo, atëherë po e vendosim në votim, kush është “për”?... Me shumicë unanime aprovohet edhe pika e fundit për këtë mbledhje. Faleminderit për vëmendjen tuaj, mirëmbetshi!

Procesmbajtësi:

Albion Krasniqi

KRYESUESI:

Afrim Kafexhiu

